

本草綱目拾遺

本草綱目拾遺木部目錄

響豆

木蛇

通香木

閨月樓皮

南天竹

子葉梗

查克木

綠益子

丁香油

檀香油

肉桂油

飛安息

夜蘭

黎椒

白胡椒
馬思

山胡椒
苔吉

金剛纂

鍛樹皮

黃葛樹

川槿皮

土漆

水團花

蔴櫪果

千張紙

木蝴蝶

風葉

拔爾撒摩

楓果

即路路通

咬人狗

刺暈

桂子

桂丁
桂耳

桂根

櫻木

樟皮

樟梨

榕鬚

櫚七樹

柏瘿

柏子殼

松球

松皮膏

羅漢松實

金松

山西柏油

松油

茶油

枯餅
茶油即柞樹子油

杉木油

清明插簷柳

柳榧

柳屑
柳葇

檉柳

桑癭

鐵扇子
櫟櫟

桑葉

莖
桑油

伽南香

特迦香

氣結

飛沉香

地臘香

金雞勒

臭梧桐

臭牡丹

木八角

草八角

鳥不宿

破布葉

天成沙

淡竹殼

桃絲竹二黃

竹衣

枸橘

葉底紅

茶樹根

爛茶葉
經霜老茶

葉

雨前茶

普洱茶

研茶

龍脊茶

安化茶

雪茶

武夷茶

松蘿茶

六安茶

普陀茶

江西峽片

羅峽

水沙連茶

紅毛茶

角刺茶

欒茶

雲芝茶

紅花茶

烏藥茶

瀘茶

瘟茶

樂山茶

本草綱目拾遺卷六

錢塘趙學敏恕軒氏輯

木部

響豆

池北偶譚樂安有孫公者年九十強健如四五十
歲人自言生平惟服響豆每歲槐子將熟時輒令
人守之不令鳥雀啄落旣成卽收作二枕夜聽其
有聲者卽響豆也因棄其餘如是數月而得響豆
所在每樹不過一枚每歲不過服一粒如是者數
十年無他術也

本草綱目卷六
顏氏家訓庾肩吾常服槐實年七十餘目看細字
鬚髮猶黑抱朴子云槐子服之令人補腦髮不白
而長生殆卽此歟

明目悅顏色開心志強筋骨補血髓

紀曉嵐先生姑妄聽之云響豆者槐實之夜中爆
響者也一樹祇一顆不可辨識其法槐始花時卽
以絲網罥樹上防鳥鵲啄食結子熟後多縫布囊
貯之夜以爲枕聽無聲者卽棄去如是遞枕必有
一囊作爆聲者取此一囊又多分小囊貯之枕聽
如初得一響者則又分二枕如是漸分至僅存二

顆再分枕之則響豆得矣

木蛇

百草鏡云木蛇似蛇有鱗甲內紋黃色如菊花瓣亦奇物也

治狗咬

通香木

邊志木長數尺出塞外以沸湯沃之取其汁洗衣服及灌一切花卉灑屋宇壁經年香氣不滅燒之能降天神香氣達數百里契丹珍之

治奇疾人不知名者服之即愈焚之辟瘟疫穢氣

邪祟

閏月椶皮

徽州者色紫爲上救生苦海椶櫚皮每歲只生十二瓣逢閏月多生一瓣惟此瓣中間有界紋爲異按詹氏小辨云椶櫚每月生一片歲生必十二片唯當閏月之年值所閏之月則此一片僅有其大半亦不成片家有椶園每歲臘盡剝之歷驗此無中氣之徵也據此則閏月椶皮無全瓣者○石室奇方椶櫚遇閏年則生半片歲長十二節閏月增半節

治血症郭大林云煨存性研陳年者尤佳服二三錢試過效驗王巽初云用一瓣燒存性作二服亦可

南天竹

卽楊桐今人多植庭除云可辟火災綱目木部南燭條載其枝葉功用云苦平無毒止泄除睡強筋益氣久服長生不饑變白卻老并引上元寶經言服草木之王氣與神通食青燭之精命不復殞皆謂指此而於其尋常日用功用概不著錄至其所引附方亦僅取聖惠方中之治風疾及誤吞銅錢

而已餘亦未之及焉故悉補之○王聖俞云烏飯草乃南燭今山人寒食挑入市賣與人家染烏飯者是也南天竹乃楊桐今人植之庭除冬結紅子以爲玩者非南燭也古方用烏飯草與南燭乃山中另有一種不可以南天竹牽混此說理確可從之明日烏鬚解肌熱清肝火活血散滯食物宜忌云南燭葉味苦性平從新云苦酸濇平

子

名紅
杷子

治八角蝨同水銀搗爛擦之卽除亦可

浸酒去風痺從新云南燭子酸甘平強筋骨益氣

力固精駐顏

子白色者
名玉珊瑚

小兒天哮三奇方 用經霜天燭子臘梅花各三錢水蛭蛭一條俱預收臨用水煎服一劑卽愈下疳久而潰爛名蠟燭疳 不藥良方紅杷子燒灰存性一錢梅花冰片五釐麻油調搽卽愈陰莖泄 慈航活人書紅杷子燒灰存性一錢加冰片五釐麻油和搽

三陰癰 文堂集驗南天竹隔年陳子取來蒸熟每歲一粒每早晨白湯下

解砒毒 劉霞裳云凡人食砒垂死者用南天竹子四兩搗水服之立活此方劉在松江府署親試

驗者如無鮮者卽用乾子一二兩煎湯服亦可

葉 洗眼去風火熱腫眵淚赤痛及小兒疳病取其葉煎湯代茶服○卻疫仙方行篋檢秘凡人稍覺頭疼身體酸困便卽感冒寒邪急宜服此藥發散毋使傳經變成時疫此方經驗多人神效異常用烏梅紅棗各三枚燈心三十根南天竹葉三十片芫荽梗三段無芫荽以葱白三節代之亦可甘草麥冬各三錢小柴胡二錢水二鍾煎一鍾不拘時溫服微汗卽愈

瘰癧初起 百草鏡南竹葉威靈仙夏枯草金銀

花各四兩陳酒四壺隔水煮透一日三服半月除根每服藥酒須吞丸藥。丸藥方僵蠶一觔炒研砂糖和丸桐子大每次吞一錢

梗

今人畫眉籠中置之可去鳥風

○作筋可治隔食隔氣

查克木

宦遊筆記塞外有查克木叢生樹高五尺許無皮枝幹清翠可愛葉似三春之柳然質甚堅並無柔條垂絲頗耐霜雪若伐以爲薪著火卽燃形似炭有紅焰而無烟置徑寸於爐中歷一二日乃燼惟生於瀚海沙磧之地遇大風根株卽拔因入土未

本草綱目卷之八
深是以天扎無經久者。○西北域記查克木產推河似絲柳而不垂無皮耐霜雪色青時入爐卽燃數日乃燼然大者拱高者尋風斯拔之何者地沙且鹹根難據而易朽也

治產難臨蓐之時握其木易產心痛燒灰服之
綠盆子

邊志出遼東樹高丈餘其葉兩兩相對開花如蓋大黃色花謝結實亦兩兩相對大如木瓜綠色春生夏熟人不可食悞食之入口卽齒落如屑舌黑如漆滿口裂碎血出如水終日不能食經旬方止

又能碎骨如泥彼處橐駝初生取以潤其蹄則千里可行否則不能行其性剛利如錐舉而刺之利如刀鋸凡作角器必用此

性烈有大毒能腐骨碎齒入外科方術家用

丁香油

百草鏡丁香油出南番乃用母丁香榨取其油色紫芳香辛烈番人貯以琉璃器蓋偶不密卽香達於外粵澳門多有之。藥性考丁香油出西番氣味甘辛性大熱透關竅驅寒力更速於丁香治胃寒痛或滴少許入煎藥或以油塗臍上痛處。

暖丹田除水瀉塗暖臍膏貼解蟬毒以一滴同薑湯服揩牙治口臭○藥性考云壯陽煖腎疝痛陰寒○按齊民要術雞舌香卽母丁香時珍所謂雄爲丁香雌爲雞舌香也丁香中雌者獨大而可取油雄者細小不中榨取予內兄朱放鵬曾宦於粵據云丁香油亦近時始有其性熱而淫凡衣飾器物經染其氣數日不滅近日豪貴家多珍之爲房帷用以色紫同玫瑰滴水巾攪之散而復聚者爲眞僞者曰樟木油色稍淡紫中帶黃黑色氣辛烈獨鼻作樟腦氣滴沐器洗衣或入香佩可以辟汗

不入藥用綱目於丁香下附丁皮及根枝不及油
或其時尙未有卽有亦未行入中土也

塗臍散臍痞受寒胃痛好酒和服

金御乘云胃寒呃逆嘔吐甚者用丁香油擦透中
脘痛痺擦痛處皆立效試過極驗

祝穆試效方治療癰化核膏用之取其香烈直透
經絡辛熱以散結滯耳

檀香油

藥性考出粵中舶上帶來

味苦除惡開胃止吐逆

肉桂油

百草鏡粵澳洋船帶來色紫香烈如肉桂氣或云肉桂脂也或云桂子所搾未知孰是

性熱氣猛入心脾功同肉桂

傳信方治各種瘡用燈草一莖約長三四寸以水稍潤再以肉桂油塗之貼背脊風府穴下至肺俞止外以棉紙條封之須臨發前一二時爲之或先一日更妙貼後次日發瘡更重嗣後漸減蓋風寒暑濕盡爲提挈而然也

水安息

出廣中洋船帶來波斯交趾皆有之形如荔枝而大外有殼包裹皮色亦如鮮荔枝開之中有香如膠漆黃褐色氣甚馥郁此物如開用不盡者須連外殼置碗中方不走溢否則遇五月黃梅時其汁自滿溢出殼外雖殼內所存不過少許亦會溢出亦一異也綱目安息香本條所言皆乾者云是樹脂集解下引葉廷珪香錄云有如餉者謂之安息油卽是此種瀕湖又未詳其功用今時頗行故采補以備用其殼有絲毫裂縫油卽走溢須以瀝青熬化滴之。百草鏡云安息香有水旱二種水安

息難得焚其香旁置水盂試之其香烟投水中遂結爲香惟分兩稍減耳。五雜俎云安息香能聚鼠其烟白色如縷直上不散

辛平無毒通心神除邪魅辟蠱毒止心痛下鬼胎入心經通腎氣尤益房箔故龜靈劑用之以興陽反魂丹用之以救急然大耗真氣凡氣虛挾火者不可服忌見火。藥性考水安息香辛苦性溫除風寒霍亂煖腎興陽治心腹蠱氣血淋遺精鬼交鬼孕薰勞瘵

辟瘟丹

陳炘回生集用紅棗二觔茵陳切碎八

兩大黃切片八兩水安息五錢合爲錠每晨焚之
種子二方 周氏家實潮腦飛升白霜一兩麝香
二錢枯礬三錢龍骨三錢良薑三錢五倍子二錢
明雄二錢水安息母丁香酥合油各五錢官桂三
錢輕粉二錢紫梢花二錢大山茨菰三錢共爲細
末煉蜜爲丸桐子大蠟丸封固月信後納一丸次
日再納一丸種子如神并治血淋白帶陰瘡陰蝕
楊梅瘡毒等症

又方 真川附子一個重一兩二三錢者山茨菰
四錢此二味要童便浸透焙乾研末川烏八錢五

本草綱目卷之六
梣子三錢此二味同研末水安息五錢生蠟酥八錢此二味同研不麻草烏五錢明雄五錢此二味同研末官桂五錢母丁香八錢同研末酥合油五錢真鴉片三錢同研末紫柏花三錢蛇床子一兩倭硫黃五錢輕粉五錢右藥爲末同白芨五錢煎水合前藥打成錠每行時用津磨少許搽莖首能治精滑并久不生子且能解毒遇瘡不染若早午晚各搽一次久不斷更有神效與前方男婦同用更佳或再加人參五錢尤妙

穿腮起管年久不愈 許氏方用水安息搽之管

化毒愈

夜蘭

嶺南雜記產粵道旁小樹也狀如木蘭亦類紫薇
高一二尺葉大如指頭頗帶藍色葉老則有白篆
文如蝸涎名鬼畫符葉下有小花如粟米至晚香
聞數十步恍若芝蘭又名蚊驚樹暑月有蚊折此
樹逐之卽驚散○粵語夜蘭木本高尺許葉如槐
花如粟米至夜則芳香如蘭折之可以辟蚊插門
上蚊不敢入一名蚊驚樹有病取其葉生啖或煎
水卽吐痰數日而愈葉上有篆文如符又名神符

樹○關涵嶺南隨筆夜蘭生羅浮幽谷中有香無
形與肉芝同爲神物與此名同物異○敏按粵志
步驚木以嫩葉和米數粒微炒煎湯飲之可愈嘔
瀉寒痰花有幽香步行遇之往往驚爲蕙蘭故亦
曰步驚永安人以嫩葉乾之持入京師作人事核
其功用形狀或卽夜蘭歟

治一切風寒諸病取葉煎湯服少頃大吐痰涎或
行路侵寒暑吐瀉危篤採數葉嚼或吐或不吐病
卽愈

黎椒

白胡椒 山胡
椒 馬思答吉

邊州聞見錄川椒故有名產自黎大所城隅者尤
香烈大小必雙肉理細密罅裂而子不墮俗呼抱
娃子椒。四川志各州縣多出椒惟茂州出者最
佳其殼一開一合者尤妙

性同川椒入藥尤效

按黎椒近日亦罕有真者外方所得俱屬彼土人
以他產僞充其功效亦僅與川椒相埒據劉少府
挹清云真者含一二粒口中可辟瘴毒解魚蝦食
毒更可爲導淫具彼土中有一種生惡瘡妓女人
不敢近惟吞黎椒三粒與之接則無害次日便出

椒內盡包其毒不入人臟腑也故真者彼土亦珍貴之罕有出售於外者

白胡椒

通雅云廣舶胡椒有一種玉椒色白味獨辛於他椒今甯波洋貨店頗多其色如雪以內外通白者爲上皮白內黃者劣解魚蝦毒入房術用。蓬萊李金什言洋舶帶來白胡椒據彼中人云卽用胡椒之嫩者生去其皮曬乾卽如白玉色非別有他種物理小識胡椒出番國亦是蔓生有白色者或曰卽萆澄茄

胃痛 百草鏡用大紅棗去核七個每個內入白胡椒七粒線紮好飯鍋上蒸七次共搗爲丸如綠豆大每服七丸溫滾水下如壯實者用十丸服後痛止而胃中作熱作饑以粥飯壓之卽安此寒食痰飲皆治

治九種心疼 葉天士方丁香去頂蓋廣木香雄黃巴豆去油淨白胡椒各三錢枳殼紅花五靈脂各一兩共爲細末好酒發爲丸如茱子大候乾收貯瓶內每服八釐唾津送下忌生冷油膩半月除根

白痧藥 種福堂方白胡椒一兩牙皂一錢火硝
檀香末明礬丁香蟾酥各三錢北細辛二錢冰片
麝香各五分金箔量加

山胡椒

百草鏡雲南木邦土司出一種山胡椒色黑顆大
主止痛破瘀

馬思答吉

五雜俎出西域似椒而香酷烈彼土以當椒用主
開胃消食破積除邪

金剛纂

滇志金剛纂花黃而細土人植以爲籬又一種形
類雞冠。湧幢小品金剛纂生天目其樹長不滿
三四尺多屈曲雖春夏亦無葉每觸其枝曳裾不
前夷緬國有是種相傳判其末漬水水必毒飲者
立死曰人瘴又能借之爲誘淫之法。張洪使緬
錄緬地有木曰金剛纂狀如棕櫚枝幹屈曲無葉
剉以漬水暴牛馬令渴極而飲之食其肉必死。
劉魁若程賦統會雲南大侯州出金剛纂青色如
刺桐最毒。滇記云金剛纂碧幹而蠟芒孔雀食
之其漿殺人以爲草者誤今曲江建水石屏處處

有之

性有大毒入丹術家用丹房本草金剛纂純陽草也伏硫與柳葉藤同用其功最神

鍛樹皮

本草補泰西有鍛樹呂宋亦有之其色紅狀如杜仲初因人取樹皮包切肉數纒抵家合成一片始知其皮能合肉接骨也因名曰鍛樹本草人參條下所載椶木音賈而此鍛音斷不同或係二種當與有識者辨之敏按椶葉與烏血柏相似而大如團扇有鉅齒初生時可裹餅餌蒸食霜後鮮赤若

丹楓照耀岩谷其皮柔韌如麻皮鳥喇之人采以治繩作魚網入水不濡又可爲鳥鎗火繩中國所無也

治折傷胎疝一切損傷肉破骨斷取皮搗碎煎酒服又以渣敷患處完好如初幼兒患疝由於胎中得者此因皮開裂腸入腎囊疼痛難忍亦能戕命此葉久貼皮膜裂處自然復合永無患矣但非幼童之年則不可治方用鍛樹皮或搗爛或削片以油潤濕黏布上貼患處外以布牢繫腰間或半年三個月方愈

黃葛樹 川槿皮

邊州聞見錄蜀多黃葛樹宜賓學宮前騎牆而生根未至地已台抱此樹以某月種每歲必某月始芽入藥用根皮藥肆中多取其皮以代川槿。峩峩山志嘉樹在羅目縣東南三十里陽山江溉兩樹對植圍各二三尺上引橫枝亘二丈相援連理陰庇百夫其名曰黃葛號嘉樹蘇子由詩予生雖江陽未省到嘉樹卽此。益部談資黃葛樹葉似桂稍大團欒蔭數畝冬春不凋幹則擁腫根皆蟠露土上至於石崖之側則全欲不藉土生者夔之

梁方最多惜無材用。○按王阮亭居易錄雲南多黃果似海棠稍大者香如佛手甘脆如梨多津液蜀產者樹而不結實其皮類川槿亦能愈癬今日黃葛或音之譌耳

治疥癬取其根皮煎湯浴之

川槿皮

生川中色紅皮厚而氣猛烈產孟獲城者只一株傳爲武侯遺植殺蟲如神生剝其皮置蟻其上卽死今亦罕有他省產者名土槿皮薄而氣劣不得混施今川人多用黃葛皮代之以售他處。○通雅

眞川槿皮切斷中有絲白茸如杜仲。羣芳譜川槿色紅氣厚力優

癰瘡 楊起簡便方癰瘡不愈以川槿皮煎湯用肥皂去核及內膜浸湯時時擦之或以汁磨雄黃搽尤妙 又見不藥良方

頑癬多年不愈。活人書川槿皮二錢輕粉五分斑毛七個大楓子七粒河井水共一鍾煎半露一夜筆蘸塗之。又方川槿皮四兩輕粉雄黃各四錢百藥煎四餅斑毛一錢巴霜錢半大黃二兩海桐皮二兩研如粉陰陽水和抓損敷之必待自落

愈

荷葉癬 活人書川槿皮切片海桐皮檳榔各二錢輕粉錢半紅娘子五分陰陽水浸一二日用鵝翎掃上如癢以竹片刮破搽此藥夜露三宿更妙
遍身頑癬 大楓子四十九枚川槿皮二兩斑毛去翅足五個川椒一錢輕粉二錢杏仁三錢海桐皮二錢共末河井水各一碗浸一夜鵝翎蘸汁搽之
癬瘡不愈 不藥良方川槿皮煎湯取肥皂去核及內膜浸湯內時時搽之

牛皮癬癩 毛世洪經驗集川槿皮一觔勿見火
曬燥磨末以好燒酒十觔加榆麵四兩浸七日爲
度不時蘸酒搽擦二三十年者搽一年斷根如無
川槿土槿亦可代之。治頑癬種福堂方川槿皮
海桐皮尖檳榔樟冰苦參黃柏白芨各二錢雷允
一錢五分大楓子杏仁各二粒木鼈四個用火酒
浸七日將穿山甲刮癬少碎以酒搽之卽愈。五
仙散經驗廣集治久年頑癬牛皮癬神效紅粉霜
五分明礬川槿皮杏仁各一錢密陀僧三錢爲末
津調抹一日三次三日全愈

粉刺 孫台石方川槿皮一兩硫黃二兩杏仁二兩去皮尖輕粉二錢樟腦五錢麝香少許爲末雞子清調早洗晚搽

秘傳雄鼠骨散 治牙落可以重生用雄鼠骨一具生打活雄鼠一個剝去皮雜用鹽水浸一時炭火上炙肉自脫落取骨炙燥入衆藥內同研爲末香附白芷川芎桑葉曬乾地骨皮川椒蒲公英青鹽川槿皮旱蓮草共爲末擦牙百日復出固齒無不效

土漆

玉環志皮如桃樹皮黏著人手卽發腫若刀瘡見血搗此皮敷之卽止

止金瘡出血

水團花

李氏草秘生溪澗近水處葉如蠟梅樹皮似大葉楊五六月開白花圓如楊梅葉皮皆可用

治金刃傷年久爛腳瘡搗皮葉毳上一宿卽癒

秘草

蘇櫪果

治胎疝毛世洪經驗集凡小兒初生發疝止見啼哭不見病形延至一周兩歲始知是疝諸醫不效

用蘇欐樹上之鴛鴦果一對其果連樹枝取下可辨真假一對果可治三人荔枝核七枚杵碎平地木三錢同煎飲卽瘥亦不復發

千張紙

木蝴蝶

木實也出雲南廣南府形似扁豆其中片片如蟬翼焚灰用

治心氣痛

按千張紙滇志以爲木實據程豹文言千張紙乃仙人掌草曬乾其中心層層作羅紋捲心折之如通草狀故名此物用七張燒灰酒服可治胃脘痛

湯桐岡云蘇州有之狀如通草約手掌大曾用入丸中可治浸淫惡瘡今並存其說以俟考本草綱目雜草內有宜南草卽此形狀亦同云主邪小兒女以緋絹袋盛佩臂上辟惡止驚而不知其可服食也

木蝴蝶

出廣中乃樹實也片片輕如蘆中衣膜色白似蝴

蝶形故名

四邊薄而明中心微厚不甚明透似有子壁錢白膜狀

治肝氣痛用二三十張銅銚上焙燥研細好酒調服○貼癰疽頂秋子云木蝴蝶出廣西儼如蝴蝶

中心如竹節色更白凡癰毒不收口以此貼之卽歛

治下部濕熱

風葉

穉史栴之桂陽縣產風葉充茗飲能愈頭風故名亦可浸酒性微熱前人志記不載

性微熱追風活血可浸酒服

拔爾撒摩

坤輿圖說木名出白露國此樹生脂膏極香烈可入藥

傅金刃傷一晝夜肌肉復合如故塗痘不癰塗屍
千年不腐

楓果

卽楓實一名櫟子乃楓樹所結子也外有刺毬如
栗殼內有核多孔穴俗名路路通以金箔貼之村
姬簪於髮云可明目宜老出浙臨安縣署後安樂
山者名錢墳楓果最佳焚之香郁可燻衣辟瘴疫
綱目楓脂香載其木皮不及其實之用今補之宜
於焚燒未有入湯液之用其果冬月卽孕蠶子
於中交春內生蠶每果中有一個立夏後乃化蛾

飛去入藥取無蟲陳久者用○槐西雜誌楓香果
出雲南者焚之殺鬼去邪辟瘴濕

辟瘴卻瘟明目除濕舒經絡拘攣周身痺痛手腳
及腰痛焚之嗅其烟氣皆愈熏衣被可除蚤

敏按楓果去外刺皮肉圓如蜂窠卽路路通其性
大能通十二經穴故救生苦海治水腫脹用之以
其能搜逐伏水也

治癰 德勝堂傳方楓木上毳十個燒灰存性白
砒五釐共末香油搽上卽愈

臙毒 古今良方路路通一個煨存性研末酒煎

服

咬人狗 刺暈

臺灣府志咬人狗其木甚鬆手摺之便長條迸起
可爲火具本高丈餘葉長大似烟葉有毛刺刺人
入毛孔甚癢搔之發紅腫痛一晝夜乃止

治療癰

臺灣使槎錄

附

刺暈 李氏草秘其樹形似烏柿有刺刺人卽暈
故名

治癰腫定疼取樹腦葉入醬板鹽花罨發背癰疽
腫毒痛甚者罨上卽止痛不問已未潰罨至愈

桂子 桂丁 桂耳 桂根

學圃餘蔬有一種四季開花而結實者此真桂也
閩中最多常以春中盛開凡桂四季者有子此真
桂也江南桂八九月盛開無子此木樨也○臨海
志唐垂拱四年三月月桂子降臨海芳香有桂氣
味食之和暢宋紹定間舒某於天台山得月桂子
二升大如樟子無皮色似白玉紋如雀卵中有仁
嚼之作芝蔴氣以之雜菊入囊爲枕有散佚石縫
中者旬日輒出樹葉柔長經冬猶在種入盆中久
之亦失所在

性溫味辛平肝煖胃胃脘寒痛甚宜。○藥性考甘辛溫中煖胃平肝益腎散寒止噦

桂丁

百草鏡云形如吳茱萸出廣西交趾乃肉桂子也治心痛辟寒邪胃痛百草鏡桂丁研細酒下三錢

桂耳

出開化山中乃多年老樹蒸出蕈也面紅色土人採得以治血疾

治一切血症及吐血

按綱目分桂爲五種曰桂卽今所謂交桂曰牡桂

今廣桂曰箇桂俗呼木犀曰天竺桂浙中山桂也
有子如蓮曰月桂四季有花者此桂子乃天竺桂
子也綱目失載主治若月桂則固載其子矣曰桂
丁乃廣桂之子綱目亦不言其主治至於桂耳則
各桂皆有之性亦畧同綱目皆不載悉爲補之。
和霽園夜談隨錄呂司馬季弟琪從司馬官嶺南
署中有小院頗幽靜舊有古井在軒右井畔有二
老桂大合抱植夏夜月光甚皎琪納涼軒下聞井
中有聲不絕凭欄窺之見井水白如銀中有紅丸
大如彈子約數十百點光明如火向上競相跳躍

漸陞漸高去欄僅尺餘琪驚白司馬次日命夫緹下探之無他異得桂子數十粒鮮赤如新琪卽戲以井水服之曰七枚七日而盡蓋適取得四十九枚也後琪壽至九十九歲無疾而逝平原董太史曲江與琪善親見而誌之。○敏按今月桂子如蓮蒨鮮者色青乾之淡黑色呂琪所見大如彈丸鮮赤如新當別是一種考天地運度經云太山北有桂樹七十株天神青要玉女三千守之其實赤如橘人食之一年可以上昇或是此種惜琪公所服止四十九枚耳故得壽

桂根

陳年入土最深者入藥用

貼牙痛可斷根卽取桂樹根上皮用

學齋帖嘒花中惟巖桂四出予謂土之生物其數
皆五故草木花皆五惟桂乃月中之木居西方地
四乃西方金之成數故花四出而金色且開於秋
云

榲木

似檜亦名水松抱木生者性韌皮同乘鮮剝削造
履俗稱抱香履潮州頗多

能治濕腳氣辟邪風

樟皮 樟梨

此香樟樹皮也綱目有樟材樟腦樟節而皮與子皆不及焉今山人率以皮子治病有效因急補之樹皮以年久老樟者爲佳治天行溫疫濕毒流注浴疥癬洗腳氣

心疼 玉局方香樟樹皮取時去面上黑色者用內第二層皮搗碎煎湯服卽止永不復發

刑杖傷 神錦方樟樹皮用老酒燉出味調老公雞冠血食止痛散血立效

霍亂上吐下瀉 傳信方樟樹皮一把水煎溫服立止

腳上生瘡 家寶方此瘡個個如小筆管大者用樟樹葉牙咬熟畧摻拔毒丹外貼樟樹葉連換卽愈

敏按樟木綱目言辛溫香竄性能除濕故山居人患病多宜之象山縣志萬厯中邑大疫有一道人教人取千年老樟樹皮煎飲可愈并言樹老久飲霜雪其性轉清涼可消疫氣此卽藏器所云樟木能治惡氣中惡鬼疰之意

樟梨

卽樟樹子也出處州府遂昌縣福羅塢仙人壩周公園大者爲貴小者次之予友黃慶春與一遂昌人相善其人饋以樟梨云可治心胃脘疼服之立效卽香樟子也較他產者畧大蓋千年樟樹所結故效如神葉南郊自處州回詢以樟梨據云此非子乃千年樟樹所結於枝桠間者如瘤然土人以形似梨故名之然則此乃樟瘤也然與予所見又不類姑並存其說以俟再考焉

磨塗腫毒治中酒心胃疼皆效

榕鬚

藥性考榕葉似大麻子如冬青枝幹拳曲木本稜
凹不成材器而結奇香其脂與漆相似可以貼金
膠物勝於楮脂。嶺南雜記榕樹閩廣最多他省
則無故紅梅驛以北無榕大者蔭十餘畝離奇古
怪備木之異然體曲不中梁柱理斜不中材用質
虛不中薪爨莊子所謂以不材而壽者也漳浦黃
石齋先生有榕頌其木年久者常結伽南香焚之
致鶴植於水際其子可以肥魚細枝曝乾束爲炬
風雨不滅其脂乳可以貼金接物與漆同其鬚可

入藥用。○說文以梟爲古松字六書故以古松字爲梟而梟爲南方之榕通雅云榕當別出狀木始於稽含分字始於戴侗柳宗元詩榕葉滿庭鶯亂啼後山叢談言蔡州壺公觀有大木四垂傍出人莫能識張戣間人嘗至蔡爲余言乃榕木此木無用惟枝上垂根曝之可作火繩以發炮又可染黑贊甯志所云倒生木不死樹橫枝生根下地如柱卽榕無疑粵志榕之怪在根自上生下語曰榕木倒生根。○粵志榕葉甚茂盛柯條節節如藤垂其榦及三人圍抱則枝上生根連綿拂地得土石之

力根又生枝如此數四枝榦互相連屬無上下皆成連理其樹可以倒插以枝爲根復以根爲枝故一名倒生樹榦多中空不堅無所用離之木也其象如離之大腹其中空處常產香木炎精所結往往有伽南焉粵人以其香可來鶴子可肥魚多植於水際其樹脂可以貼金接物與漆相似性畏寒踰梅嶺則不生故紅梅嶺有數榕爲炎塞之界有紅白大葉小葉數種○按泉州府志榕有二種一種矮而盤桓其鬚著地復生爲樹一種名赤榕上聳廣大二種蔭最寬廣入藥用有鬚者

本草綱目拾遺 卷一
固齒義復方止牙痛 取榕根鬚摘斷入竹管內
將鹽塞滿以泥封固火煨存性爲末擦牙搖動者
亦堅竹管不用

檣七樹

治腹中虻痛救生苦海用檣七樹柴內取之燒炭
研細酒下或滾水下三錢且能除根

破傷風 百草鏡檣七樹刮去外面粗皮取內白
皮搗爛酒煎服渣和白麴搗敷患處自愈

柏癭

百草鏡老樹生此其狀如瘤柏性西指乃稟西方

兌金之氣故能平胃土而治胃痛亦取其氣相攝服耳

治胃痛

柏子殼

綱目有柏實無子殼近時奇功散用之

解砒霜如神 集驗良方奇功散用柏子殼三錢

炒紅土三錢同研爲末用雞子清調服服後作一寒顫卽愈重者不過兩服

松毬 松皮膏

此卽山松所結卵毬初青久則裂作鱗甲形片片

四開而墜兒童拾之盈筐携入市貨與茶爐代炭能益茶味入藥取青嫩者綱目松下列松實云見果部不知果部乃海松子出關東與山松異山松毬內老亦有子細如粟米不中食品

白點風 家寶方先以蔥花椒甘草三味煎湯洗再以青嫩松毬蘸雞子白硫黃同磨如粉搽上八九次除根

松皮膏

色如琥珀出西域伊犁等處西域聞見錄烏魯木齊乾隆四十年改爲迪化州其土人取松皮爲膏

謂之松樹膏藥

性溫治血一切虛怯勞瘵婦女血枯血閉諸症服之有效

陳海曙家有此膏自西域帶來黑如漆上蓋松皮一塊云其松皮厚者二三尺卽此皮所熬曾以治勞嗽十日病減又十日而病痊又十日而生肌漸復如舊每服三錢空心白水調下服一月無不愈者○槐西雜誌田耕野官涼州鎮時携回萬年松一片性溫而活血煎之色如琥珀婦女血枯血閉諸症服之多驗親串家遞相乞取久而遂盡後予

本草綱目卷之六
至西域乃見其樹直古松之皮非別一種也土人
煮以代茶亦微有香氣其最大者根在千仞深澗
底枝幹直出山脊尙高二三十丈皮厚者二尺有
餘奴子吳玉保嘗取其一斤爲牀意直盤古時物
萬年之名殆不虛矣

羅漢松實

物理小識羅漢松濶瓣厚葉樹老結實長四五分
底平上銳色紫黑乾之可入藥本草綱目所未載
也○永甯僧云羅漢松葉長者名長青能結實葉
短者名短青不結實其結實儼如佛大者如雞子

小者如豆味甘可食

味甘補腎其香益肺治心胃痛大補元氣

汪連仕采藥書羅漢松一名金錢松又名徑松其皮治一切血殺蟲瘡癰合蘆薈香油調搽

金松

物理小識出台州垂條結子如碧珠三年子乃一熟每歲生者相續璀璨其間

子治腸風

山西柏油

松油

其色黑若紫者係此油腳也其氣若松香竹簪挑

之懸絲不斷者真

殺壁蝨人家牀几板壁患此者以油滴縫內其蝨盡死又搽禿瘡

治癰 集驗良方真柏油四兩黃蠟一兩雄豬膽一個斑毛三錢川椒去目并開口者三錢先將斑毛川椒二味研末聽用次將生柏油入砂鍋內熬極熟似有生烟之狀然後將蠟入油內鎔化再將豬膽汁傾入卽離火將斑毛川椒二味末子拌入用竹筴急急攪勻將藥放在滾水盆上浸三口去火毒然後入磁罐內封固聽用○治諸般癰多年

近日癰毒生柏油一瓶塗患處後用年老枯桑柴
火熏烤內有毒蟲卽死待好卽止如一次倘不瘳
再熏卽愈○又癰方經驗廣集眞柏油調輕粉塗
上起泡泡消卽愈 治狗癰疹同壽錄用柏油不
拘多少鐵杓內熬次下鵝鴿糞雞糞同和加香油
少許擦之

治頭面耳上黃水瘡 活人書眞柏油眞香油各
二兩同熬成膏搽上如神

赤遊丹 醫林集祕蜒蟒十條土蛛窠五六個出
草屋老壁內柏油舊漆器上刮下漆少許其搗以

柏油調搽患處立愈

松油

其取油法以有油老松柴截二三寸長劈如燈心粗用麻線紮把如茶杯口大再用水盆一個內盛水半盆以碗一隻坐於水盆內用蓆一塊蓋於碗上中挖一孔如錢大再以紮好松把直豎放於蓆孔中間以火點著少時再以爐灰週圍上下蓋紮勿令走烟如走烟其油則無候溫養一二時其油盡滴碗內去灰蓆取出聽用一名瀝油

治疥瘡久遠不愈百藥不效以此油新浴後擦之

或加白礬末少許和擦更妙

茶油

卽枰樹子油

枯餅

乃枰樹子油也豫省閩粵皆食茶油而不知爲枰樹子油俗呼茶油實非茶子之油也煎熬不熟食之令人瀉

味甘性涼氣腥色綠潤腸清胃殺蟲解毒不宜生食燃燈益目抹髮解腫

枯餅

藥性考云餅能浣衣除垢最潔燒灰敷瘡亦可下積洗風瘙癢可用皮葉

杉木油

經驗廣集有取杉木油法用紙糊碗面以杉木屑堆碗上取炭火放屑頂燒著少時火將近紙卽用鐵筯抹去燒數次開碗看卽有油汁在碗內治一切頑癬先用穿山甲刮破用羊毛軟筆蘸油塗上甚加疼痛停半日再塗癬自結痂而愈如已破者不必刮癬藥極多都不及此眞神方也

清明插簷柳

清明日插在屋簷下枯柳枝朝南者入藥 物類相感志清明楊柳能止醬醋之潮溢

甜瘡 濟世良方以清明插過柳枝燒存性一錢銀硃七分共研再入飛礬一分傅之

小兒胎火不尿 濟急方凡初生小兒小便不通乃是胎中熱毒未化不可用寒涼金石之劑只須取清明插簷柳枝朝南者一握煎湯服之卽尿大人小便閉服之亦效○治尿梗周子象方用清明插屋簷下枯柳一大把折碎煎湯傾坐桶內被圍住熏片時卽通再內服

白濁廬復芷園臆草清明所插柳條煎之治白濁蓋勢爲肝苗柳爲卯木同類也渾濁之色清明之

本草綱目拾遺 卷之
氣相待也用藥恰好有如此

下痢後成醢魚水此險症也慈惠小編用清明人家插簷柳取葉來煎湯下如止可救起病不多日下醢魚水年少者方可治老者難治少者勞傷之症肉而化成血水平和調理可以挽回十分之二三老者血氣久成衰弱故成此症神仙難治

柳樅 柳屑 柳茸

此乃柳花未放時其枝垂下如樅形所謂柳葦也淡黃色若俟花出則無用矣綱目有柳華無柳樅別錄乃有柳實或卽此歟

明目驅風壯筋骨堅齒牙岫巖神書有柳樁牢牙
法以柳樁指牙去其宣露諸風不生明目駐顏黑
髮聰耳壯筋力益壽輕身○急救方柳樁陰乾爲
末日用擦牙去風明目烏鬚固齒久用不微可阻
金石

柳屑

卽空心柳樹中屑也

治濕氣腿腫 慈幼筏淮陰卑濕民多粗腿偶得
一法治之甚效用空心柳樹中屑取出篩細入鍋
內炒熱以臭泔水灑濕又炒加麵少許拌勻趁熱

本草綱目拾遺

卷六

柳屑

柳葇

檉柳

三

取起敷腿上候水出再炒敷數次自愈

柳葇

陳氏筆記云柳樹上葇也煎服治心痛

檉柳

俗名西河柳性最透發綱目檉柳下云其枝葉消痞解酒毒利小便不及治疹瘡之用。宏治紹興府志檉俗呼西河柳其葉甚細似桐而香天將雨水則生花試之多驗。本草匯檉柳甘得土氣鹹得水氣故能解血分之毒消痞利便是其本功近世往往以治痧疹熱毒不出用爲發散不知本自

何氏。○本草乘雅之檉柳繆仲淳本草經疏廣之
以治痧疹此不獨取其能通又取其象形疹亦三
顯三隱三而三之合爲九烹以應九藏也。○正園
臆草檉一歲三開花一日三眠起自成一家不與
四時之生長收藏相流行超五行而純二氣無殺
機而唯生機者也且雨以陰陽氣和而作先知之
應從可知矣第氣魄渺小未可以大道載靈樞陰
陽二十五人之外有陰陽五人此當屬陰陽和平
之人又當啟陰陽自和之汗也

逢原云檉柳獨入陽明故其功專發麻疹兼解酒

毒去風煎湯洗浴風症身癢效

性平疎散驅風解表治斑疹麻瘡不出經驗方或因風而閉者俱用西河柳葉同櫻桃核煎湯洗之卽透出。救生苦海草痧藥方用之又肝天青蓮散用之。急救方治小兒痧疹不出喘嗽煩悶躁亂用西河柳葉風乾爲末水調四錢頓服立定。疹發後痢從新用西河柳葉爲末砂糖調服。疹發不透喘嗽悶亂西河柳煎湯去渣半溫用芫荽蘸水擦之但勿洗頭面並忌夜間洗之蓋痧疹晝發而夜斂也乳母及兒仍以西河柳煎服

酒積成病 良方集要西河柳曬乾爲末每服一

錢溫酒送下

桑癭

鐵扇子
桑葉滋

桑楮
油

百草鏡桑老則樹生癭其狀如瘤用刀斫下陰乾入藥

去風痺諸濕浸酒用治胃痛 百草鏡

鐵扇子

百草鏡桑葉採過二桑者勿用止採過頭葉其二葉力全至大雪後猶青於枝上或黃枯於枝上皆可用須經大雪壓過次日雪晴採下線穿懸戶陰

乾其色多青黑色風吹作鐵器聲故名鐵扇子冬至後採者良

治腸風目疾咳嗽盜汗

百草鏡

洗一切天行時眼

風熱腫痛目澁眩赤取鐵扇子二張用無油茶碗一隻要有蓋者置鐵扇子於中以滾水沖半盞蓋好候湯溫其色黃綠如濃茶樣爲出味然後洗眼拭乾隔一二時再以藥汁碗隔水頓熱再洗每日洗三五次卽愈此水一盞可洗三四十人

養素園驗方

中年眼目昏花 眼科要覽復明散用經霜雪桑葉葉須臘月在樹不落者同甘菊側柏葉荊芥穗

桑白皮如有眵淚加艾葉蒼朮發癢加赤芍川椒
爲粗末等分和勻煎湯熏洗惟紅腫者不可洗
風眼下淚 不藥良方臘月不落桑葉煎湯日日
溫洗之或加入芒硝少許

桑楮柚

乃多年老桑數被剪伐嫩條其枝頭長成如拳者
是也

治膈症 梁侯瀛集驗方用老桑楮柚燒紅存性
爲末好酒送下卽愈

桑葉滋

鮮桑葉摘開其葉筋有白汁名桑葉滋又名桑脂
綱目桑葉載其用最廣獨未及此

性微寒味苦有天絲入眼以此點之

山海草函桑葉滋點眼治蜈蚣咬

治乳癰 集聽用桑葉不拘頭二葉摘去半段取
後半段脂三分黃柏八錢水煎乾止用三分飯鍋
蒸一次夜露一宿塗患處雖爛見骨者亦能收口
平復

小石癰今人呼爲紫馬疔錢峻經驗單方云小石
癰採二蠶桑葉滴下滋水點上愈○消癰瘤秋泉

秘方用蝌蚪一錢蛇脫泥球包煨爲末三分鬼饅頭滋乾一錢桑滋乾一錢乳香沒藥各三分麝香一分共爲細末飯和搗爲錠臨用時再取鬼饅頭滋化開以雞翎搽患處過宿卽消

桑油

萬氏家抄有取桑油法鮮桑木槌碎裝入餅內用一瓶蓋口倒埋土中糠火煨之油自滴下貯罐聽用

治小兒身面爛瘡輕粉雄黃各五錢猪膽一個滑石一兩硫黃五錢穿山甲十五片炙鳳凰退燒存

性五錢爲末用桑油猪膽汁調絹包擦之

伽楠香

今俗作奇楠乘雅作奇南棧香棧木速香名而廣人亦呼奇南爲棧名同而香異也粵海香語伽楠雜出海上諸山凡香木之枝柯竅露者木立死而本存者氣性皆溫故爲大蟻所穴大蟻所食石蜜遺漬其中歲久漸浸木受石蜜氣多凝而堅潤則成伽楠其香木未死蜜氣未老者謂之生結上也木死本存蜜氣膏於枯根潤若飴片者謂之糖結次也歲月旣淺木蜜之氣未融木性多而香味少

謂之虎斑金絲結又次也其色如鴨頭綠者名綠結指之痕生釋之痕合按之可圓放之仍方鋸則細屑成團又名油結上之上也伽楠本與沈香同類而分陰陽或謂沈牝也味苦而性利其香含藏燒乃芳烈陰體陽用也伽楠牡也味辛而氣甜其香勃發而性能閉二便陽體陰用也然以洋伽楠爲上產占城者剖之香甚輕微然久而不減產瓊者名土伽楠狀如油速剖之香特酷烈然手汗沾濡數月卽減必須濯以清泉膏以蘇合油或以甘蔗心藏之以白萼葉苴之瘞土數月日中稍暴之

而後香魂乃復也占城者靜而常存瓊者動而易散靜者香以神行動者香以氣使也藏者以錫爲匣中爲一桶而多竅蜜其下伽楠其上使薰炙以爲滋潤又以伽楠末養之他香末則不香以其本香返其魂雖微塵許而其元可復其精多而氣厚故也尋常時勿使見水勿使見燥風微濕土則藏之否則香氣耗散○本草乘雅云奇南與沉同類因樹分牝牡則陰陽形質臭味情性各各差別其成沉之本爲牝爲陰故味苦厚性通利臭含藏燃之臭轉勝陰體而陽用藏精而起亟也成南之本

爲牡爲陽故味辛辣臭顯發性禁止能閉二便陽
體而陰用衛外而爲固也至若等分黃棧品成四
結狀肖四十有二則一矣沉香有四十二品第牝多而牡
少獨奇南世稱至貴卽黃棧二等亦得因之以論
高下沉本黃熟固坎端機透淺而材白臭亦易散
奇本黃熟不唯機透而黃質達理猶加熟色遠勝
生香蕤炙經旬尙襲襲難過也棧卽奇南渡重者
曰金絲其熟結生結蟲漏脫落四品雖統稱奇南
結而四品之中又有分別油結糖結蜜結綠結金
絲結爲生爲熟爲漏爲落井然成秩耳大都沉香

所重在質故通體作香入水便沉奇南雖結同四
品不唯味極辛辣著舌便木願四結之中每必抱
木曰油曰糖曰蜜曰綠曰金絲色相生成跡迥別
也奇南一品本草失載後人僅施房術及佩圍繫
握之供取氣臭尙爾希奇用其形味想更特異沈
以力行行止爲用奇以力行止行爲體體中設用
用中具體牝牡陰陽互呈先後可默會矣。宦遊
筆記伽楠一作琪楠出粵東海上諸山卽沉香木
之佳者黃蠟沈也香木枝柯竅露大蟻穴其竅蟻
食石蜜歸而遺香其中歲久漸漬木受蜜氣結而

堅潤則香成矣香成則木漸壞其旁草樹咸枯有生結者紅而堅糖結者黑而軟瓊草亦有土伽楠白質黑點今海南人取沈速伽楠於深山中見有蟻封高二三尺隨挖之則其下必有異香南中香品不下數百種然諸香賦性多燥烈薰燒日久能令人髮白血枯惟伽楠香氣溫細性甚益人而范石湖桂海香志獨不載及詎不使寶鴨金猊之間少一韻事乎但佳者近亦難得。陳讓海外逸說伽楠與沉香並生沉香質堅彫剔之如刀刮竹伽楠質軟指刻之如錐畫沙味辣有脂嚼之粘牙其

氣上昇故老人佩之少便溺焉上者曰鶯哥綠色如鶯毛最爲難得次曰蘭花結色微綠而黑又次曰金絲結色微黃再次曰糖結黃色者是也下曰鐵結色黑而微堅皆各有膏膩匠人以雞刺木雞骨香及速香雲頭香之類澤以伽楠之液屑僞充之。○物理小識云奇南與沉同類自分陰陽沉牝也味苦性利其香含藏燒更芳烈陰體陽用也奇南牡也味辣沾舌麻木其香忽發而性能閉二便陽體陰用也其品有綠結油糖蜜結金絲虎斑等鋸之其屑成團舶來者佳。○東西洋考交趾產奇

南以手爪刺之能入爪既出香痕復合又有奇楠香油真者難得今人以奇楠香碎片漬油中蠟熬之而成微有香氣此偽品也

黎魏曾仁恕堂筆記東埔寨日本支國也夜中不睹奎宿國人多騎象產奇楠其取奇楠之法國人先期割牲密禱卜有無走密林中聽樹頭有如小兒語者便急數斧而返遲則有鬼搏人隔年始一往取先上王及三偃

讀如馬彼國專政之將軍也

重加洗剔視

上者留之厚酬其值次者下者乃聽別售也○查浦輯聞榕樹千年者其上產伽楠香

金立夫言盛侯爲粵海監督時須上曉伽備入貢
命十三洋行於外洋各處購求歲餘竟無佳者據
云惟舊器物中還有所謂油結色綠掐之痕生釋
之漸合者今海外諸山皆難得矣卽占城所產香
氣輕微久而不減冬寒香藏春暖香發靜而常存
者是蜜結嗅之香甜其味辛辣入手柔嫩而體輕
爲上上品今時亦罕有其熟結生結蟲漏脫落四
結之中每必抱木曰油曰糖曰蜜曰綠曰金絲其
生結者紅而堅糖結者黑而軟或黃或黑或黃黑
相兼或黑質白點花色相生成蹟迥別也現在粵

中所產者與東莞縣產之女兒香相似色淡黃木
嫩而無滋膩質粗鬆者氣味薄久藏不香非香液
屑養不可不足寶貴其入藥功力亦薄識者辨之
味辛性斂佩之縮二便因脾保腎入湯劑能閉精
固氣故房術多用之不知氣脫必陷之症可以留
魂駐魄也瀕湖綱目香木類三十五種質汗返魂
尚搜奇必備而獨遺此何歟○藥性考伽楠味辛
下氣辟惡風痰閉塞精鬼蠱著通竅醒神邪風追
卻十香返魂丹中配藥以香中帶辛辣紅堅者佳
其次黑軟至虎斑金絲皆雜木性下品也

藏奇南香以錫匣貯蜜蘇合鑿數爲隔則潤若枯者用白芨葉苴之瘞土數月卽復日中少暴尤香忍溺法 物理小識伽侑糖結末作膏貼會陰穴則溺不出

特迦香

五雜俎出弱水西形如雀卵色頗淡白焚之辟邪去穢鬼魅避之博物志載漢武帝焚西使香宮中病者盡起徐審得鷹嘴香焚之一家獨不疫疾卽此類歟

辟邪去疫安魂魄定驚悸

氣結

出交趾眞臘占城瓊海等處單斗南云此乃伽楠
香樹中空腹內所結藉伽楠芬烈之氣得日月雨
露之精凝結而成故名氣結形亦同香塊而酥潤
鬆膩不甚堅大約伽楠得其質此得其魂亦如天
生黃出湯泉爲硫氣熏結而成者然頗難得世不
多見

治噎隔用一二釐酒磨服下嚙卽開

飛沉香

查浦輯聞海南人採香夜宿香林下望某樹有光

卽以斧斫之記其處曉乃伐取必得美香又見光
從某樹飛交某樹乃雌雄相感亦斧痕記取之得
飛沉香功用更大

此香能和陰陽二氣可升可降外達皮毛內入骨
髓益血明目活絡舒筋

方輿志生黎居五指山山在瓊州山中所產有沉
香青桂香雞骨香馬蹄棧香同是一本其本頗類
椿及樺柳葉似橘花白子若檳榔大如桑椹交州
人謂之密香欲取者先斷其積年老根經歲皮幹
朽爛而木心與枝節不壞者卽香也堅黑沉水者

爲沉香細枝堅實不爛者爲青桂半沉半浮者爲雞骨形如馬蹄者爲馬蹄粗者爲棧香

地臘香

黃夢珠輪絕句云石火平分地蠟香註云地蠟香出哈密可辟蚤蝨

辟蚤蝨

金雞勒

查慎行人海記西洋有一種樹皮名金雞勒以治瘡一服卽愈嘉慶五年予宗人晉齋自粵東歸帶得此物出以相示細枝中空儼如去骨遠志味微

辛云能走達營衛大約性熱專捷行氣血也

治瘧 澳番相傳不論何瘧用金雞勒一錢肉桂五分同煎服壯實人金雞勒可用二錢一服卽愈
解酒 煎湯下咽卽醒亦澳番傳

臭梧桐 臭牡丹

生人家牆砌下甚多一名芙蓉根葉深綠色大暑後開花紅而淡似芙蓉外苞內蕊花白五出瓣尖蒂紅霜降後苞紅中有實作紫翠色○百草鏡云一名臭芙蓉其葉圓尖不甚大搓之氣臭葉上有紅筋夏開花外有紅苞成簇色白五瓣結實青圓

如豆十一月熟藍色花葉皮俱入藥○周廷園云
臭梧桐一年三月十月兩次作花若葉無紅筋搓
之不臭者非○學圃餘疏臭梧桐者吳地野生花
色淡無植之者淮揚間成大樹花微紅者縉紳家
植之中庭或云後庭花也獨閩中此花鮮紅異常
能開百日名百日紅花作長鬚亦與吳地不同園
林中植之灼灼出矮牆上至生深澗中與清泉白
石相映永嘉人謂之丁香花

汪連仕采藥書秋葉俗呼八角梧桐味臭又名臭
梧桐取根皮搗汁如膠爲土阿魏能寬筋活血化

痞消癥

羣芳譜臭梧桐生南海及雷州近海州郡亦有之
葉大如手作三花尖長青不彫皮若梓白而堅韌
可作繩入水不爛花細白如丁香而臭味不甚美
遠觀可也人家園內多植之皮堪入藥采取無時
敏按臭桐與梧桐有家野之別家生者成樹而高
大野生者木小不成樹不過三四尺花色粉紅亦
無大紅純白者二種俱可入藥功用亦相近

治獨腳楊梅瘡洗鵝掌風一切瘡疥煎湯洗汗斑
濕火腿腫久不愈者同菴閤子浸酒服并能治一

切風濕止痔腫煎酒服貼臙瘡搗爛作餅加桐油貼神效

半支風 百草鏡取葉連根掛於風頭廊下吹乾將葉燒灰入瓶內每早服三錢酒吞○又邢虎臣驗方用臭梧桐葉并梗曬燥磨末共二觔用白蜜一觔爲丸早滾水下晚酒下每服三錢驗過神效治半邊頭痛 用川椒五錢臭梧桐葉二兩先將桐葉炒黃次入椒再炒以火酒灑在鍋內拌和取起捲在綢內紮在痛處吃熱酒一碗取被蓋頸而睡出汗卽愈

一切內外痔。○急救方用臭梧桐葉七片瓦松七枝皮硝三錢煎湯熏洗神效。

花 治風氣頭風 集聽凡頭風用臭梧桐花陰乾燒灰存性爲末每服二錢臨臥酒下三服無不愈。

止痢 必效方用隔年臭梧桐花煎湯服卽愈。
葉 消腫脹疔 救生苦海臭梧桐葉一百片煎湯服三四次。

挂心痛 華玉先試效之方臭梧桐葉每歲用一片共歲若干葉若干清水洗葉用無灰白酒煎服。

外痔 黃氏醫抄用臭梧桐葉煎湯洗數次愈

梧桐酒 經驗廣集治內外一切乳毒用臭梧桐
春夏取頭三個秋冬取根搗爛絞汁對陳酒熱服
取汗爲度神效

豨桐丸 濟世養生集此丸治男婦感受風濕或
嗜飲冒風內濕外邪傳於四肢脉絡壅塞不舒以
致兩足軟痠疼痛不能步履或兩手牽絆不能仰
舉凡辛勞之人常患此症狀似風癱服此丸立能
全愈用地梧桐俗謂臭梧桐不論花葉梗子曬乾
切碎爲末一觔豨薺草炒磨末八兩二味和勻蜜

九如桐子大早晚以白滾湯送下四錢忌食猪肝
羊血番茄等物或單用臭梧桐二兩煎湯飲以酒
過之連服十劑其痛卽瘥或煎湯洗手足亦可

莖中蟲 治風毒流注

臭牡丹

葉形與臭梧桐相同但薄而糙氣亦臭五月開花
成朶一蒂百花色粉紅

洗痔瘡治疔 赤水元珠蒼耳臭牡丹各一大握
搗爛新汲水調服瀉下黑水卽愈

一切癰疽 滇安陳老醫云用臭牡丹枝葉搗爛

罷之立消

脫肛 秘方集驗先將臭梧桐葉煎湯洗後將浮

萍草末摻上不脫矣

應昌按梧桐二字疑牡丹之訛否則此方宜列入臭梧桐

諸方之內惜不得原書正之

木八角

草八角

本高二三尺葉如木芙蓉八角有芒其葉近蒂處有紅色者佳秋開白花細簇取近根皮用○唐王周金盤草詩註金盤草生甯江巫山南陵林木中其根一年生一節人採而服可解毒也其詩云今春從南陵得草名金盤金盤有仁性生在林木端

本草綱目卷六
根節歲一節食之甘而酸風俗競採掇俾人防急
難巴中地虺毒解之如走丸巨葉展六出軟幹分
長竿搖搖綠玉沾裏裏香荷寒世云酷暑月鬱有
神物看天之產於此意欲生民安云云味詩意則
似今之草八角其性又能解蛇毒也

苦辛溫有毒治麻痺風毒打撲瘀血停積其氣猛
悍能開通壅塞痛脉立止虛人慎用

草八角

藥鑑出於潛昌化深山中葉角仰上色黃獨莖一
葉五六月開花雙朶成對粉紅色下垂根圓而不

長俗名孩兒撐傘。○百草鏡云草八角高尺許根
生疙瘩獨莖一葉入秋開花只有兩朵相對粉紅
色又名紅孩兒結子紅色成對如孩兒也其根可
以消毒入藥得草本者良根治癰毒餘功同木八
角。○葛祖方性溫治骨內之風

按八角金盤有草木二種木本者其葉尖角仰起
如盤之狀葉背色黃故曰金盤草本者葉尖角不
仰葉背不黃微有分別此藥性熱力猛有毒咀之
味麻雖壯實人亦宜少用服藥後忌魚腥猪羊牛

馬等肉犯之令人癲狂惟白菜菹

應昌按菜字疑
萊字之訛否則

菜字下當補一菜字可解入藥用近根皮酒煎服取汗卽愈力弱者發戰作吐病亦愈戚孔昭云木叉角之鬚乃麻黃未知確否

烏不宿

俗名老虎草又名昏樹晚娘棒梗赤長三四尺本有刺開黃花成穗其根下蟲治風毒流注神效○綱目有櫟木名鵲不踏與此別

性熱追風定痛有透骨之妙治風毒流注風痺跌打勞怯合保生丸治虛勞如神下胎催生

汪連仕采藥書烏不宿又名烏不踏又名刺娘白

皮性溫行血追風治紫雲風大痲風筋骨疼痛
濟世良方婦人將產時以鳥不宿莖葉剉碎一大
把加甘草一錢酒水各半煎一大鍾服之易產且
產後無病其葉如杏葉而枝梗有刺鳥不可宿故
名又名石米刺

跌蹶 百草鏡鳥不宿根皮鮮者一錢乾者七分
加入藥中煎服取汗極妙

難產 家寶方鳥不停葉一兩甘草五錢好酒二
碗煎一碗或一次二次服卽產

敏按救生苦海云茨梧桐又名晚娘棒多生山塢

最高者四尺許皮色如桑細者大如大指老者大如甘蔗若根曲而皮色紫者非也取根去泥剝其白皮擣汁用二鍾加米醋一鍾清水半鍾和勻口中噙咽可治雙單蛾若喉閉用鵝毛攪之卽開噙咽如前吐出痰涎三四碗卽能飲食如常此乃以色紫者爲非晚娘棒或同名而物異耶存以備考

破布葉

廣東通志從肇慶新橋而上人烟寥落山路多歧乃三縣交界之區舟人及此險地卽燃夢香客皆酣臥昏迷遂被啟鎬易貲財以磔塊封識宛然若

枕間置水一盂則迷藥皆渙散矣又有藥名破布葉可解行者歌曰身無破布葉莫上夢香船按廣志註夢香船中以胡蔓草合香焚之人卽迷悶解夢香毒能醒迷

肇慶志破布葉出陽江陽春恩平狀如掌而緣嶺南舟人多用香烟及毒水迷悶過客以此草煎湯服之立解

天成沙

生蘇木中劈破取之但難得須囑染坊陸續收存不拘多少入藥用

治卒心痛救生苦海以天成沙溫酒和服治心痛神效

淡竹殼

此乃淡竹嫩時所苞籜解下者是綱目竹條止載慈竹籜而淡竹畧焉不知其性能去目翳功同熊膽故爲補之

此君丹治醫一草亭眼科方用淡竹殼不拘多寡以布拭去毛燒灰存性每藥一錢加麝香三五釐同搗細末點在翳上最妙

桃絲竹二黃

李氏草秘諸癰瘡痘疔爛久不愈用桃絲竹刮取
二黃爲末敷之○降痰火煎服功勝淡竹茹○治
蛇咬天蛇毒

王安采藥方治發背不長肉取桃竹茹作餅貼之
○血崩取竹青炒末水調服

桃竹筍 治六畜瘡癰內蛆煎湯洗之卽絕秘草○

白濁煎服卽愈秘草

桃竹筍殼 治楊梅瘡煨灰酒調服王安

竹衣

此乃金竹內衣膜劈竹取鮮者入藥

治喉啞勞嗽 張景岳古方因陣治一切勞瘵痰嗽聲啞不出難治者服之神效用鮮竹衣一錢竹茹暉子大一丸卽金竹青皮也刮取之竹瀝卽取金竹燒取麥冬二錢甘草橘紅各五分白茯苓桔梗各一錢杏仁七粒去皮尖研水一鍾半加竹葉十四片煎七分入竹瀝一杯和勻服

枸橘

今之臭橘山野甚多實小殼薄枝多刺而實臭人多棄之綱目枸橘條下葉刺核樹皮俱收而其實獨畧葉天士家抄本草有主治特錄出補之入藥

陳者佳。橘錄枸橘色青氣烈小者似枳實大者似枳殼近時難得枳實人多植枸橘於籬落間收其實剖乾之以和藥味與商州之枳幾逼真矣療子癰及疝氣俱取整固枸橘煨存性研末陳酒送服

解酒毒

逢原

胃脘結痛 取枸橘實煨存性酒服方寸匕內傷諸痛以實醋浸熬膏貼須久貼方不復發以其力能破氣散熱也

葉底紅

乃小木也生山土長不過一二尺葉如石楠四月
生蕊五六朶成簇垂如芝蔴鈴樣花作青白色六
七月結小子如天竺子霜後色紅儼如天竺子而
大俗呼矮腳樟以其似樟葉而本短也山人每掘
之入市售作盆玩又名葉下紅。李氏草秘葉下
紅一名平地木長五六寸莖圓葉下生紅子生山
隰等處

治吐血 楊春涯經驗方葉底紅卽矮腳樟用二
兩洗淨木槌搗爛豬肺一個洗血淨將葉入肺管
內河井水各三碗煮爛至五更去葉連湯食之一

二次愈多食絕後患

陶殿元語予云某撫軍得宮傳秘方治吐血勞傷怯症垂危久嗽成勞無不立愈曾經試驗多人用平地木葉乾者三錢猪肺連心一具水洗淨血用白湯焯過以瓦片挑開肺管將葉包裹麻線縛好再入水煮熟先吃肺湯然後去藥食肺若嫌味淡以清漿蘸食食一肺後病勢自減食三肺無不愈者但所用乃平地木與葉下紅有別或一類相同其性本通耶

治偏墜疝氣 李氏草秘搗汁沖酒服半碗屢效

茶樹根

爛茶葉 經霜老茶葉

綱目茶子茶油俱載惟茶根及爛茶經霜老茶葉未收故補之

口爛 救生苦海茶樹根煎湯代茶不時飲味最苦食之立效

爛茶葉

此乃泡過殘茶積存磁罐內如若乾燥以殘茶汁添入愈久愈妙

治無名腫毒犬咬及火燒成瘡俱效如神搗爛似泥敷之乾則以茶汁潤濕抹去再換敷五六次全

愈救生
苦海

痘毒 家寶方用泡過茶葉曬乾爲末五倍子各等分雞子清調敷

諸毒努肉不退 保和堂秘方硫黃研細末敷上卽退再用後收口藥爛茶葉五錢烏梅三個燒灰共爲末敷上卽收

經霜老茶葉

治羊癲瘋 家寶方用一兩爲末同生明礬五錢爲細末水法丸硃砂作衣每服三錢白滾湯送下
三服全愈

好吃茶葉 家寶方卽以茶葉入肉汁湯內飯鍋上蒸吃二三次卽不喜吃

雨前茶

產杭之龍井者佳蓮心第一旗鎗次之土人於穀雨前採掇成茗故名三年外陳者入藥新者有火氣

清咽喉明目補元氣益心神通七竅性寒而不烈以其味甘益土消而不峻以其得先春之氣消宿食下氣去噫氣清六經火

下疳 外科全書雨前茶麻黃各一錢五分用連

四紙方七寸許用鉛粉錢半擦紙上鋪前二藥捲用筒子火灼存性研細加冰片各一分研勻用之偏正頭風 醫方集聽升麻六錢生地五錢雨前茶四錢黃芩一錢黃連一錢水煎服。又治頭風百發百中赤白首烏各一兩眞川芎一兩藁本二錢細辛一錢蘇葉一錢此散邪方也風寒甚者可加川羌活川烏服以此散邪不愈便進後方眞雨前茶四錢赤白首烏各二錢北細辛四分米仁一錢五分炒牛膝八分大川芎一錢五分甘草五分煎藥時令病者以鼻引藥氣服後宜密室避風至

重者四帖全愈加金銀花二錢更效若生過楊梅瘡者加土茯苓四兩煎湯煎藥

肚脹 集聽凡人肚脹不思飲食用五虎湯治之核桃川芎紫蘇雨前茶以上藥先煎好好時加老薑砂糖在湯內卽服

三陰瘡 集聽眞雨前茶三錢胡桃肉五錢敲碎川芎五分寒多加胡椒三分末發前入茶壺內以滾水沖泡乘熱頻頻服之吃到臨發時不可住不論新久諸瘡 慈航活人書白芥子一兩炒爲末雨前茶和服一撮瘡久者不過二次卽愈

遠年痢 鳳聯堂驗方臭椿皮一兩五錢雨前茶
錢半扁柏葉二錢五分烏梅棗頭各二枚酒水各
一碗煎好緩緩服恐泛

五色痢 慈惠編陳年年糕陳雨前茶冰糖茉莉
花共煎湯一盞服之立愈

消痰止嗽膏 米白糖一觔猪板油四兩雨前茶
二兩水四碗先將茶葉煎至二碗半再將板油去
膜切碎連苦茶米糖同下熬化聽用白滾湯沖數
匙服之

治痞 蜈蚣一條用頂好細茶葉煎服以身癢爲

本草綱目卷之六
醫學指南

又家寶方治痞陳年雨前茶一兩枳殼三錢水煎渣再煎次日服

傷寒無汗 彙集用白糖雨前茶入水熬數沸服下汗出即愈加生薑又治紅白痢疾

療豬癩羊兒瘋 陳氏筆記用晉礬一觔雨前茶一觔爲末茶汁米飲爲丸每服四十九丸發日前用二服茶送下

風痰癰病。生白礬一兩細茶五錢爲末蜜丸桐子大一歲十丸茶湯下大人五十丸久服痰自大

便中出斷病根 指南

風沿爛皮 眼科要覽甘石童便淬七次黃連汁
淬七次雨前茶淬七次出火氣入冰麝研勻點
頭風滿頭作痛 家寶方川芎七錢明天麻三錢
雨前茶一錢酒一碗煎六分渣再用酒一碗煎四
五分晚服過夜即愈

楊梅瘡 雄黃四兩雨前茶四兩生芝蔴四兩共
爲細末黃米磨細粉糊爲丸桐子大每早白湯下
三錢 家寶

上清丸 蘇薄荷二兩雨前茶白礪砂七錢烏梅

肉貝母訶子各三錢冰片三分煉蜜爲丸

風寒無汗 發熱頭痛者用核桃肉葱白兩前茶
生薑等分水一鍾煎七分熱服覆衣取汗

氣虛頭痛 不藥良方用上春茶末調成膏置瓦
蓋內覆轉以巴豆四十粒作二次燒烟薰之曬乾
搗細每服一字別入好茶末食後絞白湯服之立
愈

肩背筋骨痛 醫學指南槐子核桃肉細茶葉脂
麻各五錢入磁罐內二碗熬一半熱服神效

五虎湯 治外邪在表無汗而喘者麻黃三錢杏

仁去皮尖三錢石膏五錢甘草一錢細茶一撮有
痰加二陳湯生薑葱水煎熱服加桑白皮一錢尤
效

醫學指南

千杯不醉 乾葛橄欖細茶等分爲末逢半酣時
以茶服下

普洱茶

出雲南普洱府成團有大中小三等 雲南志普
洱山在車里軍民宣慰司北其上產茶性溫味香
名普洱茶。南詔備考普洱茶府出茶產攸樂革登
倚邦莽枝蠻崙慢撒六茶山而以倚邦蠻崙者味

較勝

味苦性刻解油膩牛羊毒虛人禁用 苦瀉逐痰
下氣刮腸通泄

按普洱茶大者一團五觔如人頭式名人頭茶每
年入貢民間不易得也有僞作者名川茶乃川省
與滇南交界處土人所造其餅不堅色亦黢不如
普洱清香獨絕也普洱茶膏黑如漆醒酒第一綠
色者更佳消食化痰清胃生津功力尤大也物理
小識普洱茶蒸之成團狗西番市之最能化物與
六安同 按普洱卽普洱地

普洱茶膏能治百病如肚脹受寒用薑湯發散出汗卽愈口破喉癰受熱疼痛用五分噙口過夜卽愈受暑擦破皮血者研敷立愈

悶瘡 百草鏡云此症有三一風閉二食閉三火閉惟風閉最險凡不拘何閉用茄梗伏月採風乾房中焚之內用普洱茶二錢煎服少頃盡出費容齋子患此已黑黯不治得此方試效

研茶

粵志東莞人以芝蔴諸油雜茶葉煮煎而成

去風濕解除食積療饑

本草綱目卷之六
龍脊茶

出廣西亦造成磚

除瘴解毒治赤白痢

安化茶

出湖南粗梗大葉須以水煎或滾湯沖入壺內再
以火溫之始出味其色濃黑味苦中帶甘食之清
神和胃

性溫味苦微甘下膈氣消滯去寒濕

湘潭縣志茶譜有潭州鐵色茶卽安化縣茶也今

京師皆稱湘潭茶

雪茶

出滇南色白久則色微黃以蓋烹淪清香迴勝形似蓮心但作玉芽色耳○平萊仲云雪茶出麗江府屬山中雪地所產色白味甘性大溫祛寒疾如神

甘苦性溫治胃氣積痛療痢如神

敏按雪茶出雪南永善縣其地山高積雪入夏不消雪中生此本非茶類乃天生一種草芽土人采得炒焙以其似茶故名其色白故曰雪茶已亥臘過餘杭往訪劉挹清少府啜雪茶云帶自雲南茶

片皆作筒子如蜜筒菊蕊瓣樣詢所主治因言此
茶大能煖胃凡嚴寒冰凍時啜一盞滿腹如火若
患癆損及失血過多之人腹胃必寒最忌食茶惟
此茶不忌乃相與烹瀹食之果入腹溫暖味亦苦
冽香美較他茶更厚

大觀茶論白茶自爲一種與常茶不同其條數闡
其葉瑩薄崖林之間偶然生出非人力所可致有
者不過四五家生者不過一二株所造止於二三
鎊而已芽英不多尤難蒸焙湯火一失則已變而
爲常品須製造精微運度得宜則表裏昭澈如玉

之在璞它無與論也○東溪試茶錄白葉茶民間大重出於近歲園焙時有之地不以山川遠近發不以社之先芽葉如紙民間以爲茶瑞

武彞茶

出福建崇安其茶色黑而味酸最消食下氣醒脾解酒○單杜可云諸茶皆性寒胃弱者食之多停飲惟武彞茶性溫不傷胃凡茶癖停飲者宜之治休息痢 救生苦海烏梅肉武彞茶乾薑爲丸服

松蘿茶

產徽州本經逢原云徽州松蘿專於化食○秋登
叢話北賈某貿易江南善食猪首兼數人之量有
精於歧黃者見之問其僕曰每餐如是已十有餘
年矣醫者曰病將作凡藥不能治也俟其歸尾之
北上將以爲奇貨久之無恙復細詢前僕曰主人
食後必滿飲松蘿數甌醫爽然曰此毒惟松蘿可
解悵然而返

姚希周經驗方云凡患眼服羊肝者忌服松蘿茶
以沙苑蒺藜煎湯代茶

消積滯油膩清火下氣除痰

病後大便不通 吳興錢守和慈惠小編用松蘿
茶葉三錢米白糖半鐘先煎滾入水碗半同茶葉
煎至一碗服之卽通神效

治頑瘡不收口或觸穢不收口 梁氏集驗上好
松蘿茶一撮先水漱口將茶葉嚼爛敷瘡上一夜
次日揭下再用好人參細末拌油胭脂塗在瘡上
二三日卽愈

羊兒瘋 集效方好松蘿茶末八兩生礬末四兩
米粥搗爲丸臨發日清晨及常日各服三錢米湯
下

水臙氣臙 彙集服此藥不思鹽醬一服立消活
魚一尾重七八兩去鱗甲將肚剖開去腸淨入好
黑礬五分松蘿茶三錢男子用蒜八片女七片共
入魚腹內放在磁器中蒸熟令病人吃魚連茶蒜
皆食更妙從魚頭吃起就從頭上消起如從魚尾
吃起卽從腳上消起立效

繡毬風 活人書五倍子炒松蘿茶各五錢研末
茶和敷

黃病 劉羽儀驗方生芝蔴八合好松蘿五合砂
仁二合以上三味先將芝蔴研細再另將茶葉烘

脆研再將砂仁研各爲細末和勻每日常服如年
久病深者服到黃退乃止如因好食茶葉者成黃
此方不可用

一切頭風兼熱者 王站柱不藥良方萆芡爲細
末用豬膽汁拌過啗鼻中作嚏立愈如兼濕者以
瓜蒂松蘿茶爲末啗鼻中出黃水立愈

治五癭 醫學指南破結散用海蛤通草昆布海
藻洗膽草枯礬松蘿茶各三分半夏貝母各二分
麥麵四分爲末酒調服日三次忌鯽魚豬肉

治痢疾神方 核桃五個帶殼敲碎松蘿茶生薑

糖各三錢用水三盞煎如紅痢用紅糖如白痢用白糖如紅白相兼用紅白糖各一錢五分煎服重者連渣服

五臟驗方 松蘿茶研末雞毛管炒研各等分每服二錢白湯下二十服全愈忌鹽百日

半身不遂 秘方集驗白糖槐豆子化皮紅谷子松蘿茶各五錢水三鍾煎一鍾服出汗卽愈十日後方可出門

小兒牙疳 同壽錄松蘿茶花椒去目烏龍尾食鹽各一錢童便一鍾水一鍾煎湯漱口口內含之

不可嚥下

白濁 古今良方車前草五六科陳松蘿茶一二錢燈心一二十根三味煎服止後宜服水陸二仙丸以固之

除瘟救苦丹 專治一切瘟疫時症傷寒感冒不論已傳未傳百發百中有力者宜修合以濟人陰德最大李炳文經驗廣集天麻麻黃松蘿茶綠豆粉各一兩二錢雄黃硃砂甘草各八錢生大黃二兩共爲細末煉蜜爲丸彈子大收磁器內勿令洩氣遇症大人每服一丸小兒半丸涼水調服出汗

卽愈重者連進二服未汗之時切不可飲熱湯食熱物汗出之後不忌

治爛眼皮方 種福堂方用挂金燈淨殼每殼一個摻入研細透明綠膽礬二釐或用殼十個或二十個裝套好外用淨黃泥包裹好勿洩氣炭火煨至中間殼將成黑灰存性放地上用碗蓋熄火將中間灰研細包好放土地上一夜出火毒每用灰少許放在茶杯內以冷松蘿茶浸之用薄棉紙蓋在茶面上俟茶滲出紙面上將此水洗眼皮每日五六次二三日卽愈

烏鬚方 吉雲旅抄王守副家傳烏鬚藥甚驗用
五倍子二錢皂礬四分八釐青鹽六分紫銅末一
分五釐榆香末六分松蘿茶三錢共爲末蒸透用
六安茶

張處士逢原云此茶能清骨髓中浮熱陳久者良
○年希堯經驗方有異傳終身不出天花法用金
銀花揀淨七兩六安茶真正多年陳者三兩共爲
粗末沖湯代茶每日飲數次終身不出天花雖出
亦稀極驗○千金不易方稀痘丹用新拋羊屎一
粒六安茶一錢甘草節二分燈心二十七寸赤黑

綠豆各二十一粒珍珠一分銀簪一枝洗淨油氣
水二碗煎八分溫服

太上五神茶 經驗廣集治傷風咳嗽發熱頭痛
傷食吐瀉陳細六安茶一觔山查蒸熟麥芽紫蘇
陳皮厚朴乾薑俱炒各四兩磨末磁器收貯高燥
處大人每服三錢小兒一錢感冒風寒蒸薑湯下
內傷薑湯下水瀉痢疾加薑水煎露一宿次早空
心溫服

消疽膏 廣集治一切疽仙方松香官粉細六安
茶各三錢苧麻仁去皮四十九粒爲末先將苧麻

搗爛然後入藥末搗成膏如乾少加麻油搗勻攤
青布上貼患處再以棉紙大些蓋好紮住七日全
愈

普陀茶

定海縣志定海之茶多山谷野產又不善製故香
味不及園茶之美五月時重抽者曰二鳥苦濕不
堪產普陀山者入藥不可多得

治血痢肺癰

江西岍片

羅岍

宦遊筆記出贛州府甯都縣製法與江南之岍片

異茶疏畛茶不炒甌蒸熟然後烘焙此指江南者
言耳出江西者大葉多梗但生曬不經火氣槍葉
舒暢生鮮可愛其性最消導貯飯一甌以茶泡之
經半日飯不加漲而消少許故飽食者宜飲此茶
別有一種極細炒畛乃採之他山炒焙以欺好奇
者反非其真然則茶亦不可以貌取也 花鏡畛
片產吳興似茶而實非茶種

味苦性刻利消宿食降火利痰虛人禁用以其能
峻伐生氣

羅畛

茶疏長興羅岵疑卽古人顧渚紫笋也介於山中
謂之岵羅氏隱焉故名羅西吳枝乘湖人於茗不
數顧渚而數羅岵顧渚之佳者其風味已遜龍井
岵稍清雋然葉粗而作草氣嘉靖長興志羅岵在
互通山西土地廟後產茶最佳吳人珍重之凡茶
以初生兩前者佳惟羅岵立夏開園梗粗葉厚微
有蕭箬之氣還是夏前六七日如雀舌者最不易
得然廟後山西向故稱佳總不如洞山南向獨受
陽氣專稱仙品只數十畝而已凡茶產平地多受
土氣故其質濁羅茗產高山巖石純是風露清虛

之氣故可尙。○長物志云浙之長興者佳價亦甚高今所最重荆溪稍下採茶不必太細細則芽初萌而味欠足不必太青青則茶已老而味欠嫩惟成帶葉綠色而團厚者爲上不宜以日曬炭火焙過扇冷以箬葉襯罌貯高處蓋茶最喜溫燥而忌冷濕也

味甘氣香性平滌痰清肺除煩消臃脹

治咳嗽秘方 醫學指南用川貝母茶葉各一錢

米糖三錢共爲末滾湯下

水沙連茶

產臺灣在深山中衆木蔽虧霧露濛密晨曦晚照
總不能及色綠如松蘿每年通事於各番議明入
山焙製
性極寒療熱症最效能發痘

紅毛茶

臺灣志草屬也黃花五瓣葉如瓜子亦五瓣根如
藤刨取曬或遇時氣不快熬茶飲之卽愈
治時氣腹脹或悶鬱不舒

角刺茶

出徽州土人二三月採茶時兼採十大功勞葉俗

名老鼠刺葉曰苦丁和勻同炒焙成茶貨與尼菴轉售富家婦女云婦人服之終身不孕爲斷產第一妙藥也每觔銀八錢

味甘苦極香兼能逐風活血絕孕如神

藥茶

范石湖集脩江出藥茶蓋石楠樹葉也毛文錫茶譜云湘人四月採楊桐汁作飯則必採石楠芽作茶乃能去風

治頭風

雲芝茶

宦遊筆記山東蒙山在蒙陰縣城南三十里高二
十里許周圍約三百餘里產茶曰雲芝茶土人售
於市曰蒙山茶然絕非茶類乃山石中所生石衣
如苔蘚之屬土人掬而沃之冒登茗薺○五雜俎
蒙山在蜀雅州其中峯頂尤極險穢蛇虺虎狼所
居得採其茶可蠲百疾今山東人以蒙陰山下石
衣爲茶當之非矣然蒙陰茶性冷可治胃熱之病
性寒能消積滯綱目有石蕊云性溫不言消積滯
紅花茶

出粵西似紅花嫩苗爲之士人製以贈客朱鄒道

鄉有詩

消膈滯宿食辟烟嵐瘴氣

烏藥茶

出東莞以芝蔴諸油雜茶爲汁煎之

去風濕破食積療饑

應昌枝烏藥茶與前研茶製造主治皆同未知是一是二

瀘茶

四川通志瀘州出通呼爲瀘茶

味辛性熱飲之可以療風

瘟茶

閩志出福甯府

治瘟

樂山茶

茶譜鄂州樂山出茶黑色如韭。又云出鄂州東山名東山茶色黑如韭性與韭相反食之已頭痛

本草綱目拾遺卷六終